

PAULO

Introdusaun


Bainhira ita ko'alia kona-ba misionáriu ka evanjelizadór, ita hanoin kedas ba s. Paulo nia atividade, nia halo ema barak bele hatene Jezús. Tan ne'e, maski tinan ruma liu ba ita dedika tinan ida tomak atu hakle'an s. Paulo nia moris, iha fulan ida ne'e ita hala'o jogu ida atu labarik sira bele hatene di'ak liután s. Paulo nia estilu no aprende husi nia atu haklaken Jezús iha fatin hotu.

Materiál ne'ebé presiza: S. Paulo nia imagen ka foto ne'ebé tesi iha parte.... Hena 2 atu taka labarik sira nia matan, balde ida, kupu ida, bee botir ida

Act 26, 6-29

Ita sei lee ho labarik sira frase ida-idak hodi hato'o ba sira pergunta ruma ka hala'o jogu ruma atu sira bele manán Paulo nia imagen nia pedazu ida. Atu hatán ba pergunta sira, labarik sira bele buka iha Biblia. Bainhira sira hatán ha biban atu halo jogu, sira sei manán pedazu ida no ikus nian sira tenke tau hamutuk imagen.

Molok hahú bele halo introdusaun ida atu esplika Paulo nia situasaun: Romanu sira kaer ona Paulo no tau iha kadeia, hafoin, sira deskobre katak nia mak sidadaun Roma nian, nune'e la bele fó kastigu nar-naran de'it. Tan ne'e, prokuradór Festo aproveita ho prezensa liurai Agripa atu hato'o Paulo nia situasaun. Agripa deside atu rona Paulo no bolu nia. Pasajen ne'ebé hakerek iha leten mak Paulo nia diskursu iha Agripa no Festo nia oin. (se hakarak bele mós hatudu momento ida ne'e husi remata Film S. Paulo nian)



⁶Maibé ohin ha'u hamriik iha tribunál tan ha'u-nia esperansa iha lia ne'ebé Maromak hakotu ba ita-nia bei-ala sira. ⁷Ita nia suku sanulu resin rua hein atu manán promesa wainhira sira adora Maromak kalan laron ho laran manas

? Hatene pelumenus Hebreu nia suku 3 entre 12? Paulo halo parte suku ida ne'ebé?

Tansa imi la bele fiar katak Maromak halo matebian sira moris hi'as fali? ⁹Uluk ha'u rasik hanoin katak ha'u tenke halo buat barak hasouru Jezús Nazare nia naran, ¹⁰no ha'u halo duni iha Jerusalelem. Ha'u hatama iha dadur laran ema santu barak ho kbiit ne'ebé ha'u simu husi am'lulik sira, no wainhira sira atu simu kastigu mate nian, ha'u tau ha'u-nia lia hasouru sira. ¹¹Dala barak, husi sinagoga ba sinagoga, ha'u fó todan ba sira hodi buka atu halo sira hateten aat Maromak; ha'u laran nakali teb-tebes hasoru sira tan ne'e ha'u tuir sira to'o sidade malae sira."

() Labarik sira bele hatudu drama badak kona-ba Paulo ne'ebé buka sarani sira atu fó kastigu ba sira. Bele mós fó hanoin ba sira katak Paulo asiste ba Estavão nia mate. (se labarik sei barak bele fahe ba grupu 2 ka 3 no ida-idak apresenta ninia drama)

"Hodi hanoin nune'e, ha'u la'o ba Damasko ho kbiit husi am'lulik boot sira ne'ebé haruka ha'u. ¹³Iha meio-dia tuir dalan, ou liurai, ha'u haree naroman husi lalehan, nabilan liu laron, hale'u ha'u no maluk sira ne'ebé la'o hamutuk ha'u. ¹⁴Ami hotu monu ba rai no ha'u rona lia ida ne'ebé dehan, 'Saul, Saul, tansa ó fó todan mai ha'u? Susar ba ó atu tebe buat ne'ebé kili kuda.' ¹⁵No ha'u dehan, 'Ita se, Na'i?' No Na'i hatán, 'Ha'u mak Jezús ne'ebé ó fó todan. ¹⁶Oras ne'e sa'e ba no hamriik iha ó-nia

ain. Ha'u mosu ba ó atu foti ó nu'udar atan no sasin ida kona ba buat ne'ebé ó haree ona no buat ne'ebé ó sei haree tan. ¹⁷Ha'u sei hasai ó husi povu ne'e no husi gentiu sira ne'ebé ha'u sei haruka ó, ¹⁸atu loke sira-nia matan; nune'e sira bele fila husi nakukun ba roman no husi Satanas nia kbiit ba Maromak. Nune'e sira bele hetan perdua ba sira nia sala no liman rohan iha sira ne'ebé saran tiha ona mai ha'u iha fiar."

- ☞ Hanesan ita hotu hatene, depois de hasoru Jezús iha dalan Damasku nian, Paulo sai matan delek. Ita sei halo jogu ida, oinsá matan delek ida bele lori fiar (bee) ba ema seluk.
- Fahe labarik sira ba grupu 2, sira sei hamriik hodi halo fileira; ita sei taka, ho hena ida, matan ba ida ne'ebé hamriik iha oin no sei tau balde dook husi nia no, ho kolega sira nia tulun, nia tenke ba fakar bee kupu ida iha balde laran. Fakar tiha nia sei hasae hena husi matan no sei ba kesi kolega seluk nia matan. Jogu kontinua to'o botir mamuk.

"Ne'e duni, liurai Agripa, ha'u la kontra visaun husi lalehan ne'e, ²⁰maibé, ha'u haklaken uluk ba sira ne'ebé iha Damasko no iha Jerusalem no iha rai Judeia tomak, hafoin ba gentiu sira, katak ita presisa atu hakribi sala no fila ba Maromak, hodi halo hahalok ne'ebé hatudu katak ita hakribi duni sala."

- ☞ Kalan /to'o ona / nia rohan, /loron besik / dau-daun ona./ Ne'e duni,/ ita soe tiha / hahalok / nakukun nian / no tau / hatais / funu / naroman nian (Rom 13,12)

Fahe labarik ba grupu 2 ka 3. Animador hakerek frase ida ne'e ho letra boot no tesi tuir sinál ne'ebé iha. Kahur malu di-di'ak no entrega ba grupu ida-idak frase tomak; sira tenke haka'as an atu tau liafuan tuir malu no sira sei dehan katak sa, ba labarik ida "soe hahalok nakukun nian".

²⁴Wainhira Paulo ko'alia nune'e hodi defende nia an, Festo dehan ho lia maka'as, "Paulo, ó bulak! Matenek barak liu halo ó sai bulak." ²⁵Maibé Paulo hatán, "Ha'u la bulak, ou Festo kmanek liu, ha'u dehan lialoos ho neon mós."

- ☞ Dala barak, ema hanoin katak sira ne'ebé tuir Jezús ho fuan no laran tomak, sira mak bulak! Akontese ba Dom Bosco, ba Filippo Neri... tanba sira tuir Jezús. Halo labarik sira buka akontesimentu ida kona-ba Jezús ka S. Paulo iha ne'ebé ema sira trata sira ne'e hanesan bulak.



Orasaun

Se ita ba lee 1Kor 13, ita hetan buat ne'ebé s. Paulo haklaken kona-ba domin (karidade) ne'ebé mai husi Maromak. Tanba misionáriu sira dala barak tenke haklaken ho sira-nia hahalok no la bele ko'alia, koko atu nakfilak ba orasaun buat ne'ebé s. Paulo hakerek.

Atividade

Iha ninia Mensajen ba Loron Misionáriu Mundiál, Amo Papa Francisco hateten: "Ita tenke iha nafatin aten-barani no ksolok atu hato'o, ho respeito, sorumutu ho Kristu, hodi ita sai Evanjellu nia manu-ain."

Depois de reflète kona-ba Paulo, oinsá labarik sira bele sai Evanjellu nia manu-ain hodi ba haklaken Jezús nia liafuan sira ba kolega sira ho Paulo nia attitude? Buka dalan ida hamutuk ho sira.